

Barúwa ya ncholo ya Paúli kwa Timotéeo Mulongooryo

Barúwa iyi yaandikwa ni Paúli mutumwi wa Yéesu Kirisitu (1:1-2). Paúli amwaandikira Timotéeo mutavana fuma múuji wa Lísitra. Uhu ni mwaambiriryi waachwe wa heehi ajáa (1:2-5; 2:1; Mirimo ya Vatumwi 16:1-5). Uhu Timotéeo taáta waavo ni Mugiríki ajáa, na íyo waavo ni Mnyahúudi ajáa (Mirimo ya Vatumwi 16:1). Irina ra íyo waavo ni Yuníike asewáa na maáma waavo ni Lolisi asewáa (2 Timotéeo 1:5).

Barúwa iyi yaandikwa ni Paúli mpindi ^ajáa uko isi ya Makedonía (1:3), na yaandikwa kati ya myaaka ya 62-64 keende Kirisitu ^avyaalwa. Kintu ^chabweeyya Paúli aandike barúwa iyi, ni kumutamanirira Timotéeo ataange ^vyeene vaantu ^vamura Yéesu vasaakwa viikale. Kei, amutamanirira ^vyeene Timotéeo asaakwa avalongoole vaantu ^vamura Yéesu na avakaan'ye vareke uvariyuli wa ulongo (1:3-7). Kintu chingi ^cheene Paúli amuwya Timotéeo ni ^vyeene Timotéeo ari saawala valongooli ^vabooha va vaantu ^vamura Yéesu (3:1-15). Kei Paúli amuwya Timotéeo ave ni muantu muja wo laangwa ni vaantu voosi (4:12-16) na andoovaambirirya vaantu ^vamura Yéesu mpindi ja uturikiri waavo maturii yaavo. Paúli akiindya ^vyeene viri kwa mwiikalan'yo wa vaantu ^vamura Yéesu na valala, na vawosi, na vatamwa na valongooli (5:1-6:2).

^Vyeene Kitáabu iki Chagavwa

Ukiindya wa ɔloongo na ukiindya wa nduwo ya
Mɔlɔ́ɔngɔ 1:1-20

Ukiindya wa kumwiinamira Mɔlɔ́ɔngɔ 2:1-15

^Meene yasaakwa kwa valongooli na vaam-
biriryi va valongooli 3:1-16

Vatɔmami vaaja va Kirisitu 4:1-16

Ukiindya kuri valala, vawosi na vatɔmwa 5:1-
6:2

Usúngaati wa kikomi na ɔlairiri kwa Timotéeo
6:3-21

Lɔmbi ya Paúli kwa Timotéeo

¹ Baráwa ihi yafúmire kuri niini Paúli
mutumwi ^naanirirwa kwa ɔlairiri wa Mɔlɔ́ɔngɔ
^atɔlamurirya, na kwa Kirisitu Yéesu suusu
^tumwiiláangyaa.

² Ni kwaandikira niise weewe Timotéeo,
mwaana waani wa kikomi kwa kura kuruma
kwiiswi. Nduwo, riiso ra wɔ́ja na mwiikalo
mɔ́ja, jive na weewe fuma kwa Mɔlɔ́ɔngɔ Taáta
wiitu na kwa Kirisitu Yéesu Mweenevyoosi wiitu.

Kɔ́neha ɔvariyyuli wa ɔloongo

³ Kati ^niinákáa na Makedonía, nijáa
niilomboola nkakúsea wiikale múujji wa Eféeso sa
ɔvakaan'ye vaantu vareke kwaarya ɔvariyyuli wa
ɔloongo.

⁴ ɔvasee vareke mbuwo ja ɔloongo jo vaanga,
na marina ^yasiina ɔhero ya vala baaba va nkolo.
Ayo yoosi yaréetaa nkaani, kiri vyo kweenerya
marimo wa Mɔlɔ́ɔngɔ, ura ^wɔ́jaa kwa njira yo
ruma.

⁵ Kiintu kikuulu cha ulairiri uhu, ni kweenda kura ^kwafúmaa mutimii mweeru, kuruma kwa kikomi na mutima si ^utwáalaa muuntu na kiloongii.

⁶ Vaantu vamwi vayapala aya na ivarwii na valúmaa sáare ^ng'eene jisiina kiintu.

⁷ Ava vaantu vasáakaa vave vakiindya va Miiro, maa kaa, si vatáangaa ^cheene valúusaa na ayo ^meene kwaavo viiririkanaa ni ya kikomi tuku.

⁸ Suusu tamányire, Miiro yabooha, kooni yatúubirwe ^vyeene yasaakwa.

⁹ Kei tamányire, Miiro si sa vawoloki tuku. Mi-iro ni sa vaantu ^vawúnaa miiro na vavarinduki, vara si ^vatúubaa kira Muluungu ^asáakaa na vavi, vaantu si ^vari vaaja mbere ya Muluungu na vaantu ^vamuhíntikiraa Muluungu, vaantu ^vúúlaa vala iyo na taáta waavo na vúulai.

¹⁰ Kei ni sa vahanguti, vaantu valume ^viiláalaa, vaantu ^vávaa iyoombe vaantu, na valoongo. Baa kei ni sa vaantu ^viiláhaa kwa uloongo na vara voosi ^vabwéeyaa viintu ^viisimire na uvariyuli wa kikomi.

¹¹ Masáare aya ya uvariyuli yamwaari Masáarii Maaja ya nkongojima ya Muluungu ^Adúumbwaa, ^meene niini nakwaatiwa nvariyele.

Nduwo ya Muluungu kwa Paúli

¹² Dumbi yaani ni kwa Kirisitu Yéesu, Mweenevyoosi wiitu. Yeeye aampeera ngururu sa aanvala ndiri mawoloki, akaansaawula sa murimo waachwe.

¹³ Baa neembe mbere nijaa muturiinti, namuhíntikiráa na navaturikiryáa vaantu vaachwe, yeeye aanaanga na riiso ra wúja

sa nabweeyyáa ivyo na kihoho na sa viintu si namurumáa.✠

¹⁴ Mweenevyoosi wiitu aankung'untira nduwo ^iri foo, ikujjan'ya na kuruma na kweenda kari ^kari kuva kiintu kimwi na Kirisitu Yéesu.

¹⁵ Mpíri ihi ni ya kimáári na yavalwa yima neeja kurumwa, "Kirisitu Yéesu ujja na aha weerwii joo lamurirya vaantu vavi." Na niini noo mavi kulookya voosi.

¹⁶ Maa kaa, sa isáare iri, Mulungu aanaanga na riiso ra wuja, sa Yéesu Kirisitu oonekye kuyimirirya kwaachwe ^kusiina uhero kari niini. Jeyyo, mbe ja kiintu ^kiri koonekya vara ^vari muruma siku ^jookuja, vapate nkaasu kwa siku ^jisiina uhero.

¹⁷ Haaha nyemi na nkongojima aheewe siku joosi yeeye Mutemi wa siku joosi, ^mweene asiina uhero, na si ^oónekanaa, yeeye vii noo Mulungu. Kikomi.

¹⁸ Haaha Timotéeo mwanawaani, ni kuheera niise ulairiri uhu wo tamanyan'ya na kulaala na mutwe kura ^kwaluswa kari weewe, sa ko kukwaatya ulwe nkoondo ^yabooha.

¹⁹ Kei ukwaate kumuruma Yéesu na mutima wo kiisiman'ya mavi na maaja. Vaantu vamwi vayasi-ita masáare ayo, na sa jeyyo, vamala kuruma kwaavo.

²⁰ Vaviri va avo vaantu, ni Himenáayo na Alekisáanda,✠ ava navakwaatya kwa Irimu sa rivalaire chiiru, kari jivamuhiantikire Mulungu tuku.

✠ **1:13** Laanga Mirimo ya Vatumwi 8:1-3.
Timotéeo 2:17-18; 4:14.

✠ **1:20** Laanga 2

2

Uvari yuli Utámanyany' yaa na Kumwiinamira Mweenevyoosi

¹ Cha ncholonchoolo, ni vawyiira niise, mândookiiloombera kwa Mulungu sa avaambirirye na avatalarye vaantu voosi. Kei mândoomũdũmba Mulungu sa vaantu voosi.

² Mândooloomba jeyyo sa vatemu na vara voosi ^vari na wiimiriri ^veene vari utemii, sa twiikale mwiikalo mũja na utuuli, kei tũve na nyemi kwa Mulungu na mũja kwa vaantu voosi mbere ya Mulungu.

³ Masáare aya yabooha, kei yamweéryaa mutima Mulungu atulamurirya.

⁴ Yeeye asáakaa vaantu voosi valamuririwe na vataange kikomi.

⁵ Mulungu ni mũwi vii, na kwatĩte mũntũ mũwi vii ^avakũndikan' yaa vaantu na Mulungu. Mũntũ hũ ni Kirisitu Yéesu.

⁶ Yeeye mweeneevyo iitoola ave Mununuuli wa vaantu voosi. Kĩntũ iki chaláiraa kikomi muryũngu wa Mulungu kwa mpiĩndi jaachwe.

⁷ Haaha sa masáare aya, Mulungu aansaawũla mbe mutumwi, kei nive mweeneri wa Masáare Maaja kwa vaantu si ^vari Vayahúudi. Ayo ^noolũsa ni ya kikomi na si noolũsa uloongo tũkũ.

⁸ Nooloomba kira haantu ^mukiiĩĩingaa, vaantu valũme vamuloombe Mulungu kũũ vookiĩnurirya mĩkono yaavo miija isiina nkalari na nkerũkerũ.

Tũũva ja Vaantu Vaki

⁹ Kei noosaaka vaantu vaki vandookwiirũwika ^vyabooha koonekya nyemi na vandookiivikira

vira ^vyeene visáakwaa. Kari viiháambaa ko suka njwiiri tuku, kwiivikira saháabu na mpári tuku, baa kei kari viiwúkiraa ingo ja iyoombe ikulu tuku. ¹⁰ Maa kaa, viirúwike mirimo miija, ja ^vyeene vyasaakwa kwa muntu muki ura ^alusaa kiweerwii amwiinamiraa Mulungu.

¹¹ Muntu muki iikiindye kimi na ave matu.

¹² Niini si noovarekera vaantu vaki vandoovavariyurira no viimirira vaantu valume tuku, maa kaa, vaantu vaki vandookirinya sawu.

¹³ Mulungu amumba Adáamu ta, de akamumba Háawa.

¹⁴ Baa kei, si Adáamu noo ^akooverwa tuku, ni muntu muki noo ^akooverwa akiingira uvii.✧

¹⁵ Maa kaa, muntu muki lamuririwa ari ko va na vaana, kooni atúubire kumuruma Kirisitu, kaveenda vaantu, kuva muja mbere ya Mulungu na kubweeyya ^vyeene vyasáakwaa.

3

Valongooli va Vaantu ^Vamuruma Yésu

¹ Mpíri ihi ni yo kiilaangiwa, “Kooni muntu avúre na mpiima yo va malongooli, uwo muntu atiite mpiima ya murimo ^wabooha.”

² Muntu uwo wo va malongooli, asaakwa ave muntu wa kikomi, ave mulume wa muki umwi, muntu ^iisikana, muntu ^adáhaa kwiiyimirira, muntu ^anyémiwaa, muntu ^atényaa vaantu, na ave muntu ^amányire variyula masáare neeja.

³ Kari ave mureevi tuku, kari ave eenda mpía tuku, baa kei, kari ave muntu ^eenda nkoondo

✧ 2:14 Laanga Ncholo 3:1-13.

tuku, maa kaa, ave muntu ^ahola, ^eenda mwi-
ikalo muija.

⁴ Asaakwa alongoole nyuumba yaachwe neeja,
na asaakwa ave alóngoolaa vaana vaachwe neeja,
sa vandomuteera na vave na nyemi kwa vaantu
voosi.

⁵ Sa kooni muntu si adáhaa kulongoola
nyuumba yaachwe mweeneevyo, jooli ari
daha kulongoola mpuka ya vaantu ^vamura
Mulungu?

⁶ Mulongooli kari ave muntu ^amura Yésu
siku ingai vii ^jilóokire tuku, sa ifaanaa akiivaa
kipeembe, maa aweye, aho, maa aheewe irya
ra Mulungu ja Ikúlu ra Mirimu Mivi ^vyeene
raawya.

⁷ Kei asaakwa ave muntu ^ataangikana kwa
mirimo muija ni vaantu ^vari weerwii, kari ji
abeerulwe, maa awyire mutewii wa Ikúlu ra
Mirimu Mivi tuku.

Vaantu ^Vavaámbirirya Valongooli

⁸ Viivyo baa vaantu ^vaámbiraa mirimo ya
nyuumbii ya Ijva vasaakwa vave vaantu
^vanyémiwaa, kari vave kosikosi tuku au vareevi
tuku, baa kei kari vave vaantu ^veenda mpía ja
muhonyo tuku.

⁹ Vasaakwa vakwaatye fuumbo ya isii yo mwi-
ilaangya Yésu kwa mutima si ^vatwáalaa na
kiloongii.

¹⁰ Vayereniwe ta, kooni si vang'úrurwaa, maa
de vaande mirimo yo vaambirirya valongooli.

¹¹ Viivyo, vaki vaavo vasaakwa vave ni vaantu
^vanyémiwaa, na vaantu si ^valúusaa vaantu, maa

kaa, vave vaantu ^viisikana na ^viiláangiwa kwa kira kiintu.

¹² Vaambiriryi va valongooli vave valume va muki umwi, vaantu ^valóngoolaa vaana vaavo na kaaya jaavo neeja.

¹³ Vaambiriryi va valongooli, kooni vatámamire mirimo yaavo vyabooha, nyemiwa vari na kuva vari na ngururu jo lusika na kipeembe mbere ja vaantu, masáare ya kumwiilaangya kwaavo Kirisitu Yésu.

Masáare ^Meene Muluungu Ayavariyula

¹⁴ Baa neembe nookoona kuuja ndiri noo kulaanga siku ^jookuuja, niini nakwaándikire masáare aya, sa

¹⁵ kooni nachérevire kuuja, masáare aya kubweyya yari utaange viintu vaantu ^vasaakwa viikale nyuumbii ya Muluungu. Nyumba iyo ni mpuka ya vaantu ^vamura Muluungu ^Ari Nkaasu, na ni ngururyo na mwaariryio wa kikomi.

¹⁶ Fumbo ya mwiikalo wo tuuba kira Muluungu ^asáakaa ni nkúlu.

Avariylwa kwa maviri wa muutu,

ooneka kikomi ni mawoloki kwa Mutima Muija,

oonekana na mirimu muija,

avariylwa kwa vaantu va isi joosi,

akarumwa ni weeru,

akasumulwa na kurumwii na nkongojima.

4

^Vyeene Timotéo Alaiririwa

¹ Haaha Mutima Muija yootuwyira baa tu-visa tuku, siku ja uhero, vaantu vamwi reka vari

kumwiilaangya Yéesu, na tuuba vari ukwaata wa mirima mivi, na uvariyuli waavo.

² Uvari yuli uwo wujaa kwa njira ya uloongo wa vakweembi, vara vari na mitima si idáhaa kwiisi-man'ya mavi na maaja. Mitima yaavo yaakwa ja yachimikwa ni chuuma kiki mooto.

³ Vaantu ava, vavakáan'yaa vaantu vareke kwiiloola na vandooneha vyóorya vimwi vimwi. Vyóorya ivyo Mulungu avyumba sa vihokerwe na dambi ni vara vataanga kimári na vamuruma Yéesu.

⁴ Sa kira kintu umba Mulungu chabooha. ✧ Na kusiina kintu baa kimwi vii cho siita tuku, kooni takihókire na dambi,

⁵ sa viintu chatalariwa na isáare ra Mulungu na ko loomba.

Mutumami Muija wa Yéesu Kirisitu

⁶ Kooni uvawýirire vaaniitu na marumbu yitu masáare aya, weewe kuva uri mutumami muija wa Kirisitu Yéesu, wiikiindya kikomi cha kumuruma Yéesu na uvariyuli muija ura utúbua.

⁷ Siita mbuwo jo vaanga ja ihi weeru, baa kei, kari utúbua símo ja uloongo tuku, weewe tuuba kwijuvirya weemweene mwiikalo utúbua kira Mulungu asákaa.

⁸ “Sa kwijuvirya maviri kwareeta kunáalo jaachwe, maa kaa, mwiikalo utúbua kira Mulungu asákaa, watiite kunáalo kwa kira njira, sa waréetaa kwiichuunga kwa Mulungu kwa nkaasu ya haaha na nkaasu yookuija.”

✧ 4:4 Laanga Ncholo 1:31.

⁹ Mpíri íhi ^ndúusire ní yo kiilaangiwa, kei yíima neeja kurumwa ní vaantú voosi.

¹⁰ Íki noo ^chabwéeyya tándootú mama na ngururunguruuru, sa taviika kwiilaangya kwiitú kwa Mulúungu ^Ari Nkaasu síkú joosi, Mulúungu Mulamuriri wa vaantú voosi ^veene vamuruma.

¹¹ Ivi viintú ^nookúlairiya, vavariyúire sa vav-ituube.

¹² Kari urúmaa múuntú yoyoosi akúhenerere ati sa úri mutavana tukú, maa kaa, fafa, sa vaantú ^veene vamuruma Yéesu vandookúlaanga na vatuubiriryé ndúusika yaako, lúyeendo lwaako, kweenda kwaako, kuruma kwaako na mwiikalo waako múuja.

¹³ Manyika mbere ja vaantú kúsoma Masáare ^Yari Mpeho, kúyakiindya na kúyavariyúla, fúuru haantú ^nkuújire.

¹⁴ Kari úrékaa bweeyya úra wúuya ^mweene úri nowo tukú, wúuya úra ^waheewa ní Kirisitú kwa masáare ya Ijáva ya uláali na mutwe na ko vikirwa mikono ní vawosi.

¹⁵ Iririkana neeja ayo yoosi na úmanyike sa kudoma na mbere kwaako koonekane kwa vaantú voosi.

¹⁶ Laanga neeja ^vyeene wookiikala na ^vyeene woovariyúla. Tuuba kutú mama ayo, sa kooni úbwéeyyiirye jeyyo, kiilamurirya úri weewe mweeneevyo na vara ^veene vookúteerera.

5

Kúvatú mamira Vaantú ^Vamuruma Yéesu

¹ Kari úmúbéerulaa moosi tukú, maa kaa, múwyíire ja woomuwyíira taáta waanyu.

Udoovakaan'ya vatavana ja ^vyeene uvakáan'yaa vaanaanyu va inda imwi,

² vadala, ja viintu ^ukáan'yaa íyo waanyu na vahíinja ja maruumbu yaako va inda imwi.

³ Udoovanyemya valala vara ^vasiina muntu wo kiitumbairirya.

⁴ Baa neembe ni jeyyo, mulala ^ari na vaana, au vajukulu, avo vaana na vajukulu viikiindye ta kuvambirirya vanduu vaavo. Jeyyo noo ^vyeene vandoohindula masáare ^meene vabweeyiriwa ni vavyiri vaavo. Ivyo, noo viintu ^vimweéryaa mutima Mulumungu.

⁵ Mulala ura ^asiina muntu baa umwi wo kitumbairirya, yeeye amwiilángyaa Mulumungu vii, na amulóombaa Mulumungu amwaambirirye chobu chiriri.

⁶ Maa kaa, mulala ^íikalaa na mpiima mbi, uwo aakwya baa neembe ari mooyo.

⁷ Udoovawyiira masáare aya vaantu ^vamwiilángyaa Kirisitu sa vave vaantu va kikomi.

⁸ Kooni muntu si yookiilaanga nduu yaachwe, na kikomi vara ^vari kaayii kwaachwe, re muntu uwo akuhire moongo kumuruma Yésu na muntu uwo aviiha kulookya ura si ^amuruma Yésu.

Kuvaambirirya Valala

⁹ Kari mumwaandike mulala yoyoosi ^mweene si anafikya myaaka makumi masasatu (60) tuku. Uwo mulala ave ni ura ^ajaa aloolwa ni mulume umwi.

¹⁰ Kei ave amányirwe atumamaa maaja, ura ^avarera vaana vaachwe vyabooha, ura ^avatéengyaa vayeni na cheeru, ura ^avoóyyaa

vaantu va Mulungu majeo,* ura ^avaámbirirya
vaantu va Mulungu ^vari na uturikiri na ura
^eenda tumama mirimo miija.

¹¹ Maa kaa, kari mavaándikaa vahíinja valala
hamwi na valala tuku, sa mpíma jaavo kooni
javarémiire kiiseyya vari kwa Kirisitu, maa val-
oolwe.

¹² Sa jeyyo, kiiheera vari irya so hinduka na
nyuma kwa yara masáare ^vajaa vamwiilaha
Kirisitu.

¹³ Si jeyyo vii tuku, kei viijóvyaa kuyeenda
nyuumbii ja vaantu sa uvira, na ^chavíhaviíha
vaándaa lúusa vaantu, maa vakiiyingirya masáarii
si ^yari yaavo, aho, valúsaa viintu ^visivateire
kulúusa.

¹⁴ Sa jeyyo, ni vakiindya niise valala vara
^vakaari vahíinja valoolwe, vave na vaana na
valaange nyumba jaavo, kwa njira iyo, mavi si-
indwa ari kutufontorirya.

¹⁵ Ni lúusa niise jei, sa kwatite valala vahíinja
^vareka kumutuuba Kirisitu, vakatuuba Irimu.

¹⁶ Kooni kari na muuntu muki ^amuruma
Kirisitu ^mweene ari na mulala wa nduu yaachwe,
indoomulaanga, kari avarekere vaantu viingi vara
^vamura Yéesu tuku. Sa jeyyo, iyo mpuka ya
vaantu ^vamura Yéesu indoovalaanga valala
vara ^vari vooveene.

* **5:10 ura ^avoóyyaa vaantu va Mulungu majeo:** Ni tuuva
ya Kiyahúudi yo vateengya vayeni. Mweenenyumba avahéeraa
maaji vakiiyoyya majeo vooveene au mutámwa avooyyaa majeo
yaavo. Mpíndi ijo, vaantu vayeendaa njirii ^jiri na iruri. Sa jeyyo,
majeo yaavo yavijaa na iruri ^riri foo. Kei veeneisi va Ijéva novo
vooyyaa majeo de viingire na Kaayii Njija ya Ijéva.

^Meene Yasaakwa kwa Valongooli

17 Vawosi ^veene viimiriraa mirimo ya vaantu ^vamura Kirisitu vyabooha, vavalwe viima neeja kunyemiwa kaviri, na varavaara ^vatumamaa murimo wo lusa no varyula Masáare Maaja, vasaakwa vanyemiwenyemiiwe.

18 Sa Masáare ^Yari Mpeho yalusa, “Kari wi-ichúungaa ng’oombe malomo tuku, kati ^yoovaa viryo luuwii,”✧ kei yalusa, “Mutumami iima neeja kucheewa masála waachwe.”✧

19 Kari uhókeraa kiloongi cha moosi kooni si kiréetirwe na mashahídi vaviri au vatatu tuku.✧

20 Vawosi vara ^vabwéyyaa uvi uvadalavye mbere ja vaantu sa vingi voofe.

Paúli Yoomukaan’ya Timotéeo

21 Ni kulairirya niise mbere ya Muluungu, na mbere ya Kirisitu Yéesu, na mbere ya mirimu miija yaachwe ^isaawula, kikomi uyakwaatye masáare aya na uyabweyye na kari umulángaa muuntu miiswii mirimwii yaako tuku, na kari usínanalaa vaantu tuku.

22 Kari usúngurirya kumuviikira muuntu mikono tuku. Kubweyya jei, ifaanaa kukakubweyya wingire uvii waachwe. Ilaange neeja na uve uteréere.

23 Kanywa maaji meene vii tuku, maa kaa, undoonywa divái kiduudi sa inda yaako na ulwiri waako wa kweene kweene.

✧ 5:18 Laanga Nkambukira ya Miir 25:4. ✧ 5:18 Laanga Lúka 10:7. ✧ 5:19 Laanga Nkambukira ya Miir 17:6; 19:15.

24 Uvi wa vaantu viingi woonekaa kiweerwii vii, na wavalóngooryaa no heewa irya, maa kaa, uvi wa vaantu viingi wuújaa nyuma ntaha.

25 Viivyo mirimo miija ni kiweerwii iri na mirimo miija ira si iri kiweerwii yoonekanaa na nyuma.

6

Ufairiri kwa Vatámwa vara Vamuruma Yésu

1 Kira ari isi ya iyóoki ra utámwa, amavale mweenekaaya waachwe iima neeja kuheewa nyemi joosi, sa vaantu vasiindwe kandoomutukira Mulungu na uvari yuli mweene tookiindya.

2 Vara vatámwa va veenekaaya vara vamuruma Kirisitu, kari vaviinurirya mpula veenekaaya vaavo tuka. Voovo vakumbukire avo ni vaanaavo kwa Kirisitu. Kiri vyoova jeyyo, vatámwa avo vavatamamire veenekaaya vaavo vyaboohabooha, sa veene vooturya kúnáálo fuma murimwii waavo, ni vara vamuruma Kirisitu, na voovo vaveenda.

Uvari yuli wa Uloongo na Usúngaati wa Kikomi

Vavari yure aya masáare na vakalaamye vay-atuube.

3 Kooni muntu yoyoosi yoovari yula masáare yiisimire, na yoosiita masáare ya kikomi ya Mweenevyoosi wiitu, Yésu Kirisitu, na uvari yuli wa mwiikalo utúubaa kira Mulungu asáakaa,

4 muntu uwo iiyónaa yeeye noo yeeye na si amányire kiintu tuka. Eenda maatuku kwiiruta ndihi sa masáare vii. Na uko kwiiruta ndihi kwaréetaa wiitóoli wa kivina, kwiivaa, kituki, kwi-ikoverera vaantu vivi,

5 na kwiitoola ^kuisíraa. Miryungu yaavo yasaambuka, na kira kimáári vasikimányire tuku. Kei viiséaa kutuuba mwiikalo ^utúubaa kira Muluungu ^asáakaa noo njira yo va vasúngaati.

6 Maa kaa, mwiikalo ^utúubaa kira Muluungu ^asáakaa na kwiikinkima na kira kiintu ni usúngaati mukuulu.

7 Sa suusu si tuuja na aha weerwii na kiintu chochoosi tuku, baa kei si turi kwiinuka aha na kiintu chochoosi tuku.

8 Maa kaa, kooni turi na chóorya na ingo, twi-ikinkime.

9 Vaantu vara ^vari na uláku wo va vasúngaati vayérwaa na vakwáatwaa ni minyahu na mpiima ^jiri foo ja kihoho. Ijo mpiima javatwáalaa furu imalwii na vamárikirira kuko.

10 Sa kweenda mpía ni ichina rimwi ra uvi woosi. Vaantu vamwi sa kura kusaaka mpía viikera na kumuruma Kirisitu, vakiiturikirya kwa usungu mukuulu.

Paúli Yoomukiindya Timotéeo

11 Maa kaa, weewe muuntu wa Muluungu, unehe masáare yoosi mavi. Umanyike kutuuba uwoloki, utuube mwiikalo ^utúubaa kira Muluungu ^asáakaa, utuube kumuruma Muluungu, kwiiyenda, kuy-imirira na kuhola.

12 Undoolwa nkoondo ^yabooha yo muruma Muluungu. Kwaatirira nkaasu ya siku ^jisiina uhero, ^ng'eene waaniririrwa ni Muluungu kati ^ukaluse bila yoovisa kumuruma Muluungu mbere ya vaantu ^vari foo ^voona.

13 Muluungu avihéeraa viintu vyoosi nkaasu. Ni kulairira niise mbere yaachwe na mbere ya

Kirisitu Yéesu. Uhu noo ^atoola ushahídi waachwe ^wabooha miiswii ya Poontío Piláato baa visa tuku.☆

¹⁴ Kwaatya ulairiri uhu, kari ureke baa kadawo tuku na kari uhon'ye tuku fuuru siku ^ng'eene Mweenevyoosi wiitu, Yéesu Kirisitu ^ari hinduka.

¹⁵ Kuhinduka kwaachwe reetwa kari ni Muluungu kwa mpiindi jaachwe. Atalariwa Muluungu, yeeye vii noo ^Ari Mwiimiriri, Mutemi wa vatemi, Mweeneevyo wa veeneevyo!

¹⁶ Yeeye ari nkaasu kwa siku ^jisiina uhero, iikalaa kiweerwii ^kisisésererwaa ni vaantu. Yeeye si anoonwa ni vaantu tuku na kusiina muuntu ^ari daha kumoonu tuku. Nyemi na laviro ni na yeeye viri kwa siku ^jisiina uhero! Kikomi.

¹⁷ Valairirye vasúngaati va ihi weeru vareke kwi-ineenga, kari viiláangyaa usúngaati waavo ^usiri wo kiilaangya tuku, maa kaa, viilaangye Muluungu. Yeeye atuhéeraa viintu vyoosi ^viri foo sa tweerye mitima.

¹⁸ Valairirye vandoobweeyya maaja, vave vasúngaati va mirimo miija. Kei vaboohye inda na vandoovaambirirya vaantu viingi na usúngaati waavo.

¹⁹ Kwa njira iyo, kiivikira vari usúngaati ja mwaariryo ^wiima neeja siku ^jookuuja, vaturye nkaasu ya kikomi.

²⁰ Timotéeo, imirira viija masáare ^meene ukwaatiwa ni Muluungu. Neha masáare ya weeru na kwiiruta ndihi ^kweene vaantu kwa uloongo vaséaa ni umanyi.

²¹ Sa kutuuba umanyi uwo, vaantu vamwi vareka kumuruma Yéesu.

☆ 6:13 Laanga Maáriki 15:2.

Mweenevyoosi avaheere nduwo nyuunyu
voosi.

Rangi **Rangi Translation Project (New Testament)**

copyright © 2023 Wycliffe Bible Translators, Inc.

Language: Rangi

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 7 May 2025 from source files dated 8 May 2025

f1dc5da6-bc39-5ea5-ac13-942132b5feb6